

ACHT NA gCUIDEACHTAÍ 2014
CUIDEACHTA FAOI THEORAINN RÁTHAÍOCHTA
NACH bhFUIL SCAIRCHAIPITEAL AICI

BUNREACTH

de chuid

SEACHTAIN NA GAEILGE

Uimhir chláraithe 377053

Dáta corpraithe 17 Deireadh Fómhair 2003

ACHT NA gCUIDEACHTAÍ 2014

CUIDEACHTA FAOI THEORAINN RÁTHAÍOCHTA NACH bhFUIL SCAIRCHAIPITEAL AICI

BUNREACTH

de chuid

SEACHTAIN NA GAEILGE

MEABHRÁN COMHLACHAIS

1. Ainm

Is é ainm na cuideachta SEACHTAIN NA GAEILGE.

2. Saghas na cuideachta

Cuideachta atá inti atá faoi theorainn ráthaíochta, atá cláraithe faoi *Chuid 18 d'Acht na gCuideachtaí 2014*.

3. Príomhchuspóirí

Is iad na príomhchuspóirí dá mbunaíodh an Chuideachta (na “Príomhchuspóirí”)

(i) chun seachtain ollmhór nó tréimhse oiriúnach eile, lán le himeachtaí oideachasúla agus siamsaíochtúla, idir chultúrtha, traidisiúnta agus comhaimseartha, a reachtáil ar fud na hÉireann agus níos faide i gcéin, le muintir na hÉireann uilig agus cairde páirteach ann,

(ii) chun an Ghaeilge a chur chun cinn mar chroílár na seachtaine (nó na tréimhse socraithe) agus aird na meán a tharraingt ar an nGaeilge,

(iii) chun an Ghaeilge a chur chun cinn ag leibhéal an phobail agus aitheantas dá réir a bhronnadh ar phobail agus ar dhaoine aonarach mar thoradh ar a gcuid iarrachtaí,

(iv) chun pobail a thógáil le nasc na Gaeilge agus aitheantas ar a gcuid iarrachtaí a bhronnadh orthu.

4. Cumhachtaí

Beidh na cumhachtaí a leanas ag an gCuideachta, anuas ar na cumhachtaí a bhronn an dlí uirthi, nach bhfuil ach ina gcumhachtaí coimhdeacha agus ina bhfochumhachtaí leis an bPríomhchuspóir agus ní féidir ach na cumhachtaí siúd a fheidhmiú agus na

Príomhchuspóirí á chur chun cinn. Tá aon ioncam a ghin feidhmiú na gcumhachtaí seo le cur i bhfeidhm ar chur chun cinn na bPríomhchuspóirí:

- 4.1 Chun aon tabhartas maoinne d'aon chineál agus aon réadtiomnú, leagáid nó bliantacht, suibscríbhinn, bronntanas, ranníocaíocht nó ciste a iarraidh agus a sholáthar agus a ghlacadh agus a fháil, ina measc trí mheán párolla a thabhairt nó trí shocruithe comhchosúla eile, agus lena n-áirítear (ach gan teorainn a leagan ar ghinearáltacht an mhéid thuas), crannchuir a chur ar bun i gcomhréir leis an dlí ar mhaithe leis na Príomhchuspóirí a chur chun cinn, agus an caipiteal, anuas ar ioncam ó aon leagáid, tabhartas nó ciste den saghas sin a chur i bhfeidhm ar an gcuspóir sin.
- 4.2 Aon iontaobhais charthanúla a ghabháil de láimh, a ghlacadh, a fhorghníomhú agus a riar, gan luach saothair.
- 4.3 Aon chomhlachas nó institiúid, iontaobhas nó ciste carthanúil a bhunú agus tacú leo nó cabhrú leo ina mbunú, agus chun airgead a shuibscríobh nó a ráthú d'aon chuspóir carthanúil a mheasfaidh an Chuideachta a rinneadh a ríomh chun a Phríomhchuspóirí a chur chun cinn.
- 4.4 Ranníocaíochtaí, tabhartais nó tiomnachtaí deonacha nó airgead a bhailiú agus a fháil atá dírithe ar na cuspóirí thuasluaite.
- 4.5 Iarratas a dhéanamh thar ceann na Cuideachta ar aon údarás, bíodh údarás rialtais, áitiúil, daonchairdiúil nó eile i gceist leis, ar chistiú airgeadais d'aon sórt.
- 4.6 Aon Acht den Oireachtas nó reachtaíocht eile a bhaineann go díreach le cur chun cinn na bPríomhchuspóirí a chur i bhfeidhm, a achainí nó a chur chun cinn.
- 4.7 Faoi réir chlásal 5, chun an fhoireann sin a fostú, agus ar na téarma siúd, atá riachtanach nó inmhianaithe ar mhaithe leis an bPríomhchuspóir a chur chun cinn i gceart.
- 4.8 Chun pinsean, aiscí, liúntais nó cúnamh carthanúil a dheonú d'aon duine a d'fhéadfadh a sheirbheáil leis an gCuideachta mar fhostaí, nó do mhná céile, fir chéile, leanaí nó cleithiúnaithe eile an duine sin a fhad agus nach sáróidh na pinsin, aiscí, liúntais nó an cúnamh carthanúil sin é sin a fhoráiltear i scéim pinsin atá cumhdaithe ag Cuid 30 den Acht Comhdhlúite Cánacha 1997 agus a fhad gur oibrigh an Chuideachta an scéim pinsin sin agus go raibh tairbhí na bpinsean, na n-aisc, na liúntas nó an chúnamh charthanúil, nó a gcéile nó a dtuismitheoir, ina c(h)omhalta den scéim pinsin fad a bhí sé/sí fostaithe ag an gCuideachta; agus chun íocaíochtaí a dhéanamh i dtreo árachais agus chun cistí coigiltis agus sochair a fhoirmiú agus cur leo ar mhaithe le haon duine atá fostaithe ag an gCuideachta agus chun airgead a shuibscríobh nó a ráthú do chuspóirí carthanúla.

- 4.9 Aon réadmhaoín, paitinní, cóipchearta, ceadúnais, cearta agus pribhléidí nó aon eastát nó leas, dá laghad, agus aon chearta, pribhléidí agus éasúintí ar nó maidir le haon mhaoín a cheannach, a ghlacadh ar léas nó mar mhalairt, ar fruiliú nó a fháil ar bhealach eile a d'fhéadfaí a mheas atá riachtanach ar mhaithe le cuspóirí na Cuideachta agus chun aon talamh a fuair an Chuideachta nó a bhfuil leas aici inti a fhorbairt agus a úsáid nó brabús a bhaint astu agus, go háirithe, tríd an gcéanna a leagan amach agus a ullmhú ar mhaithe le foirgnimh agus áiseanna a thógáil, a athrú, a tharraingt anuas, a mhaisiú, a chothabháil, a fheistiú suas agus trí chur, pábháil, draenáil, feirmeoireacht, saothrú, ligean nó léasanna foirgnimh nó trí chomhaontú tógála agus trí airgead a réamhíoc le agus iontráil isteach i gconarthaí agus socruithe do gach cineál le tógálaithe, tionóntaí agus le daoine eile.
- 4.10 Aon chuid de mhaoín na Cuideachta a fháil, a shealbhú, a dhíol, a bhainistiú, a ligean ar léas, a mhorgáistiú, a mhalartú nó a dhiúscairt d'fhonn Príomhchuspóir na Cuideachta a chur chun cinn, a chosaint nó a spreagadh agus chun infheistíochtaí a éagsúlú.
- 4.11 Comhoibriú le haon chumann nó institiúid eile i dtabhairt faoi aon infheistíochtaí a údaraítear leis seo chun na Príomhchuspóirí a chur chun cinn.
- 4.12 Airgead a fháil ar iasacht agus a thiomsú ar an mbealach sin a d'fhéadfaí a mheas gurb ionann é agus caoithiúil, agus chun bintiúir, stoc bintiúir agus urrúis eile a eisiúint, agus ar mhaithe le haon fhiachas nó oibleagáid eile den Chuideachta a chur faoi urrús chun maoín uile nó aon chuid de mhaoín reatha nó amach anseo na Cuideachta a mhorgáistiú nó a mhuirearú agus a mhorgáistiú nó a mhuirearú go comhthaobhach nó de bhreis ar aon urrúis de chuid na Cuideachta trí ghníomhas iontaobhais nó trí dhearbhu eile.
- 4.13 Airgead agus maoín na Cuideachta nach dteastaíonn láithreach bonn a infheistiú agus déileáil leo ar an mbealach sin is éifeachtaí a sholáthróidh cistí chun na cuspóirí thuasluaite a chothú agus a chur chun cinn agus áireofar leis an gcumhacht seo an chumhacht chun aon infheistíochtaí a athrú a rinneadh fúthu, ó thráth go tráth.
- 4.14 Aon airgead de chuid na Cuideachta a infheistiú ar na bealaí siúd a mheasann na Stiúrthóirí is inmhianaithe nach dteastaíonn láithreach bonn lena úsáid maidir lena Príomhchuspóir agus chun aon airgead den sórt sin a thaisceadh le baincírí agus le daoine eile; faoi réir, mar sin féin, go ndéantar infheistíochtaí faoi na coinníollacha siúd (más ann dóibh) agus an toiliú sin (más ann dó) a d'fhéadfaí a cheangal nó a fhorchur sa dlí agus faoi réir, chomh maith leis sin, an méid a fhoráiltear anseo thíos; tá cead roimh ré le fáil ó na Coimisinéirí Ioncaim sa chás go mbeartaíonn an Chuideachta chun cistí a charnadh i gcaitheamh tréimhse os cionn dhá bhliain d'aon chuspóirí.
- 4.15 Tabhairt faoi na oibleagáidí agus aisíocaíocht nó íocaíocht na bpríomhshuimeanna agus ús aon duine, ghnóthais nó cuideachta nó díbhinní nó ús aon urrús, ina measc

(gan dochar a dhéanamh do chineál ginearálta an mhéid thuas) aon chuideachta arb í cuideachta sealbhaíochta na Cuideachta nó fochuideachta nó cuideachta ghaolmhar de chuid na Cuideachta, a ráthú, tacú leo nó a chur faoi urrús, cé acu trí chúnant pearsanta nó trí cheangaltas, maoin agus sócmhainní (reatha agus amach anseo) go léir nó aon chuid díobh de chuid na Cuideachta a mhorgáistiú nó a mhuirearú.

- 4.16 Billí malartaithe, nótaí gealltanais, billí luchta, barántais, bintiúir agus ionstraimí soshannta nó inaistrithe eile a dhreachtú, a ghlacadh, a dhéanamh, a fhorghníomhú, a lascainiú, a fhorghníomhú, a eisiúint agus a aistriú.
- 4.17 Chun maoin na Cuideachta a árachú i gcoinne aon riosca intuartha ar a luach iomlán agus polasaithe eile árachais a ghlacadh chun an Chuideachta a chosaint, nuair a bhíonn gá leo.
- 4.18 Aon duine de na Stiúrthóirí, nó na Stiúrthóirí go léir, a árachú i gcoinne dliteanas pearsanta a thabhaítear maidir le haon ghníomh nó easnamh arb ionann é agus sárú ar iontaobhas nó sárú ar dhualgas nó a líomhnaítear gurb ionann é agus sárú ar iontaobhas nó sárú ar dhualgas, a fhad agus a ghníomhaigh sé nó sí le dea-intinn agus i bhfeidhmiú a fheidhmeanna nó a feidhmeanna mar iontaobhaí carthanais (faoi mar a shainmhínítear in Acht na gCarthanas 2009).
- 4.19 Iarratas a dhéanamh ar aon phaitinní, brevet d'invention, ceadúnais, lamháltas agus a leithéid agus iad a cheannach nó a fháil ar bhealach eile a bhronnann aon chearta eisiacha nó neamheisiacha nó teoranta ar úsáid nó aon fhaisnéis rúnda nó eile maidir le haon aireagán ar dhealraitheach go bhféadfaí é a úsáid d'aon cheann de chuspóirí na Cuideachta nó chun aon cheann de chuspóirí siúd a fháil, a bhféadfadh go bhfuil an dealramh air go ndearnadh iad a ríomh go díreach nó go hindíreach chun dul chun sochair na Cuideachta, agus chun ceadúnais a úsáid, a fheidhmiú, a fhorbairt nó a dheonú maidir le maoin, cearta nó faisnéis a fuarthas ar an mbealach sin nó chun úsáid nó brabús a bhaint as an maoin, cearta nó faisnéis sin.
- 4.20 Glacadh leis an mbealach sin chun táirgí agus/nó seirbhísí na Cuideachta a chur in iúl is dealraitheach is caoithiúil agus go háirithe, trí fhógraíocht sna nuachtáin, trí chiorcláin, trí shaothair ealaíne nó shuime a cheannach nó a thaispeáint, trí leabhair agus tréimhseacháin a fhoilsiú agus tríd an idirlíon agus trí dhuaiseanna, luaíochtaí agus tabhartais a dheonú.
- 4.21 Fóntais phoiblí a choimeád, a fheabhsú nó a sholáthar, ina measc áiseanna áineasa, cúram leanaí, slainte poiblí, baile, áiseanna leasa agus óige, go ginearálta.
- 4.22 Iontráil in aon socrúithe le haon rialtais nó údaráis, bíodh siad ina rialtais nó údaráis arda, bardasacha, áitiúla nó eile a bhféadfadh gur dhealraitheach go gcuirfidís an Príomhchuspóir chun cinn agus chun aon chearta, pribhléidí agus lamháltas a fháil ón rialtas nó údarás sin a fhéadfaidh an Chuideachta a mheas is inmhianaithe chun

tabhairt faoi aon socrúithe, cearta, pribhléidí agus lamháltais den saghas sin agus iad a fheidhmiú a chomhlíonadh.

- 4.23 Iontráil i gcomhpháirtíocht nó in aon chomhaontú le haghaidh brabúis a roinnt, leas a aontú, comhoibriú, comhfhiontair, lamáltas cómhalartach nó ar bhealach eile le haon duine, cuideachta, cumann, iontaobhas nó comhpháirtíocht eile a bhfuil a gcuspóirí go hiomlán carthanúil, a dtugann a gcuspóirí faoi, nó a bhfuil a gcuspóirí ar tí tabhairt faoi, aon ghnó nó idirbheart ar féidir tabhairt faoi d'fhonn dul chun sochair na Cuideachta go díreach nó go hindíreach agus a chuireann toirmeasc ar dháileadh ioncaim agus sócmhainní dá mhéid, dá laghad, de bhun Chlásal 6 anseo istigh agus chun conarthaí na Cuideachta a ráthú, go gcabhraíonn an Chuideachta, ar bhealach eile, le haon duine, cuideachta, cumann, iontaobhas nó comhpháirtíocht eile sin, agus chun scaireanna, stoc, bintiúir, nó stoc bintiúir agus urrúis aon duine, cuideachta, cumainn, iontaobhais nó comhpháirtíochta sin a tháthcheangal nó a fháil ar bhealach eile, agus chun an céanna a dhíol, a shealbhú, a atheisiuint le ráthaíocht nó gan ráthaíocht nó chun déileáil leis an gcéanna ar bhealach eile.
- 4.24 Clárú nó corprú na Cuideachta a thabhairt chun críche i ndlíthe nó faoi dhlíthe aon áite lasmuigh d'Éirinn.
- 4.25 Tabhairt faoi, ar bhonn aonair nó i gcomhar le daoine eile, aon trádáil nó gnó a bhféadfadh an Chuideachta a tabhairt faoi ar bhealach buntáisteach, i dtuairim na Stiúrthóirí, i dtaca le nó anuas ar aon cheann de ghnóthaí nó de ghnó ginearálta na Cuideachta i dtabhairt faoi na Príomhchuspóirí.
- 4.26 Aon chistí, comhlachais nó institúidí a bhunú, a fhóirdheonú agus cabhrú leo a dheimhnítear a chuireann na Príomhchuspóirí chun cinn nó a thugann cúnaimh dó.
- 4.27 Ceangail a bhunú agus a choimeád le heagraíochtaí idirnáisiúnta agus náisiúnta a bhfuil a mhacasamhail de chuspóirí acu.
- 4.28 Gach rud dlíthiúil eile sin a dhéanamh a mheasfaidh an Chuideachta bheith teagmhasach le agus a chuidíonn leis na Príomhchuspóirí thuasluaite.
- 4.29 Chun gach ceann de na rudaí agus na ceisteanna a thuasluaitear, nó aon chinn díobh, a dhéanamh in aon chuid den domhan agus mar phríomhoifigigh, gníomhairí, conraitheoirí, iontaobhaithe nó mar dhaoine eile agus trí iontaobhaithe, gníomhairí nó daoine eile agus cé acu ar bhonn aonair nó i gcomhar le daoine eile.

A FHAD:

- (a) i gcás go nglacfaidh an Chuideachta aon mhaoín i seilbh nó go sealbhaíonn sí aon mhaoín a d'fhéadfadh bheith faoi réir aon iontaobhas, ní dhéileálfadh an Chuideachta le nó ní infheisteoidh an Chuideachta an céanna ach ar an mbealach sin a cheadaítear sa dlí agus aird ar na hiontaobhais siúd;

- (b) ní mheasfar go gcuirtear san áireamh in aon rud a chuimsítear anseo thuas aon chuspóirí nach bhfuil carthanúil i gcomhréir leis an dlí sna cuspóirí dá mbunaíodh an Chuideachta.

5. Ioncam agus Maoin

- 5.1 Ní chuirfear ioncam agus maoin na Cuideachta i bhfeidhm ach i dtreo chur i bhfeidhm na bPríomhchuspóirí amháin, faoi mar a leagtar amach iad sa Bhunreacht seo. Ní dhéanfar aon sciar d'ioncam agus de mhaoin na Cuideachta a íoc nó a aistriú go díreach nó go hindíreach trí dhíbhinn, bónais nó ar bhealach eile cibé caoi trí bhrabús do comhaltaí na Cuideachta.
- 5.2 Ní cheapfar aon Stiúrthóir le haon oifig na Cuideachta a n-íoctar tuarastal nó taillí leis an oifig sin, nó ní bhfaighidh aon Stiúrthóir aon luach saothair nó sochar eile in airgead nó i luach airgid ón gCuideachta. Ní cuirfidh aon ní cosc ar an gCuideachta, afách, na nithe a leanas a íoc le hintinn mhaith:
 - (a) luach saothair réasúnta agus cuí le haon chomhalta nó seirbhíseach den Cuideachta (nach Stiúrthóir é nó í) as aon seirbhísí a soláthraíodh don Chuideachta;
 - (b) ús ar ráta nach sáraíonn 1% os cionn Ráta Táirgthe Idirbhainc an Euro (Euribor) sa bhliain ar airgead a thug Stiúrthóirí nó comhaltaí eile den Chuideachta ar iasacht leis an gCuideachta;
 - (c) cíos réasúnta agus chuí ar an áitreabh a lig aon chomhalta den Chuideachta ar fhorléas agus ar léas (aon Stiúrthóir san áireamh) leis an gCuideachta;
 - (d) costais réasúnta agus cuí as póca a thabhaíonn aon Stiúrthóir maidir lena f(h)eastal ar aon cheist a imríonn tionchar ar an gCuideachta;
 - (e) táillí, luach saothair nó sochar eile in airgead nó i luach aigid le haon chuideachta a bhféadfadh Stiúrthóir bheith ina c(h)omhalta di nach sealbhaíonn breis agus an céadú cuid de chaipiteal eisithe na cuideachta sin;
 - (f) aon íocaíocht a dhéanamh le duine de bhun comhaontú inar iontráladh i gcomhlíonadh alt 89 d'Acht na gCarthanas 2009 (i gcaitheamh an trátha a bhíonn sé leasaithe, sínte nó ionadaithe).

6. Breisiúcháin, athruithe nó leasuithe

Ní mór don Cuideachta a chinntiú go bhfuil cóip ag an Rialtóir Carthanas dá Bunreacht is déanaí. Má bheartaítear leasú a dhéanamh ar Bhunreacht na Cuideachta óna dteastaíonn faomhadh roimh ré a fháil ón Rialtóir Carthanas, ní mór fógra roimh ré a thabhairt, i scríbhinn, faoi na hathruithe beartaithe don Rialtóir Carthanas chun iad a fhaomhadh, agus ní chuirfear an leasú i bhfeidhm go dtí go bhfaightear an faomhadh sin.

7. Foirceannadh

Más ann d'aon mhaoin, dá laghad, i ndiaidh gach dliteanas agus fiachas a shásamh, ní íocfar í nó ní dhéanfar í a dháileadh i measc comhaltaí na Cuideachta, ar fhoirceannadh nó ar dhíscaoileadh na Cuideachta. Ina ionad sin, déanfar an mhaoin sin a thabhairt nó a aistriú chuig institiúid charthanúil nó institiúidí carthanúla eile a bhfuil príomhchuspóirí acu atá macasamhail phríomhchuspóirí na Cuideachta. Cuirfidh an institiúid nó na hinstitiúidí, a bhfuil an mhaoin le tabhairt dóibh nó a aistrú chuici nó chucu, cosc ar dháileadh a n-ioncaim agus a maoine i measc a gcomhaltaí dá mhéid sin, ar a laghad, a ghearrann an Chuideachta faoi nó de bhua Chlásal 5 anseo istigh. Roghnóidh comhaltaí na Cuideachta an institiúid nó na hinstitiúidí ábhartha ag nó roimh thráth an díscaoilte, agus mura féidir agus dá mhéid nach féidir éifeacht a thabhairt do na forálacha siúd, tabharfar nó aistrefar an mhaoin chuig cuspóir carthanúil áirithe i ndiaidh chomhaontú an Rialóra Carthanas a fháil. Ullmhófar agus seolfar ar aghaidh cuntais deiridh, lena n-áireofar mír a shainaitníonn agus a dhéanann luacháil ar aon sócmhainní a aistrítear mar aon leis na sonraí faoi na faighteoirí agus tearmaí an aistrithe.

8. Dliteanas Teoranta

Tá dliteanas na gcomhaltaí teoranta.

9. Gealladh chun Ranníocaíocht a dhéanamh

Geallann gach comhalta den Chuideachta chun ranníoc le sócmhainní na Cuideachta, má dhéantar an Chuideachta a fhoirceannadh fad a bhíonn sé nó sí ina c(h)omhalta nó má dhéantar an Chuideachta a fhoirceannadh laistigh de bhliain amháin i ndiaidh an dáta nach comhalta é/í den Chuideachta a thuilleadh,

- (a) chun fiachais agus dliteanais na Cuideachta a íoc a conraíodh sula gcuirtear deireadh leis nó léi bheith mar chomhalta a thuilleadh, agus chun costais, muirir agus speansais a bhaineann le foirceannadh a íoc; agus
- (b) coigeartú chearta na ranníocóirí ina measc féin, den tsuim sin a d'fhéadfadh bheith ag teastáil, nach sáraíonn €1, a íoc.

10. Stiúrthóirí

Is é triúr íoslíon na stiúrthóirí nach bhfuil gaolta lena chéile agus atá neamhspleách ar a chéile.

AIRTEAGAIL COMHLACHAIS

RÉAMHRÁITEACH

1. Beidh feidhm ag forálacha Acht na gCuideachtaí 2014 maidir leis an gcuideachta ach amháin sa mhéid go n-athraítear iad leis seo.

COMHALTAÍ & STIÚRTHÓIRÍ

2. Is iad a bheidh ina gcomhaltaí agus stiúrthóirí den chuideachta ar feadh tréimhse bliana ná:
 - (i) Uachtarán Chonradh na Gaeilge ex-officio
 - (ii) Duine amháin ón gCoiste Gnó de Chonradh na Gaeilge ainmnithe ag an gCoiste Gnó i ndiaidh Ard-Fheis an Chonartha

Is féidir le haon duine díobh siúd réamhráite ó (i) go (ii) a bheith athcheapaithe ag na húdaráis cuí go bliantúil. Má éiríonn aon duine díobh siúd réamhráite ó (i) go (ii) as a bheith ina (h)oifigeach nó ina b(h)all den Choiste thuas luaite faoi seach éireoidh sé/sí as a bheith ina c(h)omhalta agus stiúrthóir den chuideachta agus déanfaidh an Coiste Gnó ceapacháin sealadach go dtí an gcéad Ard-Fheis eile.

Is iad a bheidh ina gcomhaltaí agus stiúrthóirí den chuideachta ar feadh tréimhse dhá bhliain ná:

- (iii) Fostaí amháin ó scéim phobail a bhaineann le Conradh na Gaeilge
- (iv) Beirt ionadaí ó Chraobhacha an Chonartha le bheith tofa ag Ard-Fheis an Chonartha
- (v) Ionadaí amháin ó Bhaill Aonair an Chonartha le bheith tofa ag Ard-Fheis an Chonartha
- (vi) Triúr ionadaí ó na grúpaí a bhí páirteach sa tSeachtain, le hionadaí amháin ar a laghad ag teacht ón dá dhlínse in Éirinn, le bheith tofa trí thoghchán poist.

Is féidir le haon duine díobh siúd réamhráite ó (iii) go (vi) a bheith athcheapaithe ag na húdaráis cuí gach dara bliain. Má éiríonn aon duine díobh siúd réamhráite ó (iii) go (vi) as a bheith ina (h)oifigeach nó ina b(h)all den Choiste thuas luaite faoi seach éireoidh sé/sí as a bheith ina c(h)omhalta agus stiúrthóir den chuideachta agus cuirfear fothoghchán poist ar siúl taobh istigh de 6 seachtaine leis an bhfolúntas a líonadh.

Is é/í a bheidh ina c(h)omhalta agus stiúrthóir den chuideachta ar feadh tréimhse a f(h)ostaíochta ná:

- (vii) Ard-Rúnaí Chonradh na Gaeilge

CRUINNITHE GINEARÁLTA

3. Toghfar cathaoirleach agus leasathaoirleach ó na stiúrthóirí le tréimhse stiúrthóireachta dhá bhliain, i. na stiúrthóirí ó (iii) go (vi), ar feadh tréimhse dhá bhliain.
4. Is é córam gach cruinnithe ginearálta ná cúigear as an deichniúr gcomhalta.
5. Tionólfar an cruinniú ginearálta bliantúil taobh istigh de trí mhí i ndiaidh deireadh Sheachtain na Gaeilge gach bliain.

STIÚRTHÓIRÍ

6. Ní bhfaighidh duine ar bith aon luach saothair as gníomhú mar stiúrthóir ar an gcuideachta, ach féadfaidh an bord stiúrthóirí íocaíocht a dhéanamh le haon stiúrthóir ar aon chaiteachas as póca nó caiteachas réasúnta taistil a thabharfaidh an stiúrthóir sin, le húdaráis nó le ceadú

na stiúrthóirí agus ar an gcoinníoll sin amháin, a d'fhéadfadh sé tabhú i ngnáthghnó na cuideachta nó ina leith.

7. Ní bheidh aon stiúrthóir fostaithe ag an gcuideachta i gceapaíocht eile, ná ní bheidh aon fhostaí incheaptha mar stiúrthóir ar an gcuideachta.

IMEACHTAÍ STIÚRTHÓIRÍ

8. Beidh Cathaoirleach an bhord stiúrthóirí mar chathaoirleach ar chruinnithe nó an leaschathaoirleach ina (h)ionad mar chathaoirleach nuair nach féidir leis/léi a bheith i láthair. Beidh vóta réitigh ag an gcathaoirleach.
9. Is iad cúigear stiúrthóirí córam gach cruinnithe stiúrthóirí.
10. Féadfaidh na stiúrthóirí cuireadh a thabhairt d'aon duine nach stiúrthóir ná comhalta den chuideachta é/í freastal ar chruinnithe den bhord stiúrthóirí gan cead vótála.
11. Beidh ionadaí ó Sheachtain na Gaeilge Teoranta ar Choiste Gnó Chonradh na Gaeilge tofa go bliantúil i ndiaidh Ard-Fheis an Chonartha ó stiúrthóirí Sheachtain na Gaeilge Teoranta réamhluaite ag (v), i. na stiúrthóirí ó na grúpaí a bhí páirteach sa tSeachtain.
14. Féadfaidh na stiúrthóirí aon chumhachtaí dá gcuid a tharmligean chun coistí ar a mbeidh stiúrthóir amháin den bhord ar a laghad de réir mar a cheapfaidh an bord. Féadfaidh gach coiste comhaltaí eile a chomhthogadh nach stiúrthóirí ná comhaltaí den chuideachta iad. Beidh gach coiste freagrach don bhord stiúrthóirí.

RÚNAÍ

15. Ceapfar Bainisteoir na Seachtaine mar rúnaí na cuideachta.

AN GHAEILGE

16. Is trí Ghaeilge a dhéanfar gnó na cuideachta.

SINNE, na daoine leithleacha a bhfuil ár n-ainmneacha agus ár seoltaí foscríofa, is mian linn go ndéanfaí cuideachta dinn de bhun an Mheabhráin Chomhlachais seo.

AINMNEACHA, SEOLTAÍ AGUS TUAIRISCÍ NA SÍNITHEOIRÍ

Eoghan Mac Cormaic
Baile an Mhuilinn
Cill Chríost
Baile Locha Riach
Co na Gaillimhe Oifigeach Forbartha

Séagh Mac Siúrdáin
Doire Choill
Casla
Conamara Oifigeach Leas an Chomhphobail

Aoife Ní Scolaí
83 Bóthar Tritonville
Dumhach Trá
Baile Átha Cliath 4 Riarthóir Chonradh na Gaeilge

Peadar Tomás Mac Ruairí
Creagán,
6 Ascaill Bhreandáin
Baile Átha Cliath 5 Iriseoir

Seán Fionnbarra Ó Drisceoil
Saoirsinn
Na Forbacha
Co na Gaillimhe Comhairleoir Gnó

Eimear Nic an Bhaird
10 Grosvenor Lodge
Rath Maoinis
Baile Átha Cliath 6 Mac Léinn

Helen Ó Murchú
31 Corrán Naoimh Fhiontain
Cill Fhiontain
Baile Átha Cliath 13 Riarthóir

Arna dhátú an 13ú lá seo de Mheán Fómhair 2003
Finné leis na sínithe anseo thuas:
Dáithí Ó Maolchoille, Cuntasóir Cairte
75 Páirc Weston
Baile Átha Cliath 14